

SIPA prikupila dokaze u akciji Damask Jurišni prsluci, puške i bombe za put u Siriju

U istrazi će kao dokazi biti korišteni i propagandni materijal, razne bilješke, te spiskovi

U antiterorističkoj akciji koju su po naredbi Suda i Tužilaštva BiH izveli pripadnici Državne agencije za istrage i zaštitu (SIPA) u kojoj je uhapšeno 16 osoba i pretreseno 17 objekata na širem području BiH, pronađeni su i privremeno oduzeti ručne bombe, puškomitraljezi, poluautomatske puške, vazdušne puške i duge vrste pušaka, pištolji, okvirovi za municiju, municija različitog kalibra, maskirni panciri i jurišni prsluci. Zaplijenjeni su i privremeno oduzeti računari i računarska oprema, uređaji za pohranjivanje podataka, mobiteli, te SIM-kartice, propagandni materijal (CD-ovi, DVD-ovi, brošure, knjige, zastave), razne bilješke, spiskovi i drugi predmeti koji mogu poslužiti kao dokaz u daljem postupku, saopćeno je iz SIPA.

U akciji su uhapšeni Husein Bilal Bosnić, Hamdo Fojnica, Muhammed Džerahović, Emin Hodžić, Adem Karamuja, Mirza Kapić, Ibrahim Delić, Eduard Durguti, Senad Hukić, Enes Mešić, Elvir Muratović, Sedin Huseinović, Fiket Zukić, Avdullah Hasanović i Jasmin Jašarević, pod sumnjom da su u vrhu ve-habijskog pokreta koji djeluje u BiH. Zukić i Fojnica su nakon saslušanja pušteni na slobodu, dok je

Sud BiH jednomjesečni pritvor odredio Bosniću, Hasanoviću, Mešiću, Hodžiću i Karamuji. Oni se terete za krivično djelo organiziranje terorističke grupe u vezi sa krivičnim djelom javno podsticanje na terorističke aktivnosti i krivično djelo vrbovanje radi terorističkih aktivnosti.

Tužitelj Dubravko Čampara je na sjednici održanoj prethodno u Sudu BiH kazao "da se u sudnici nalaze petorica ljudi koje Tužilaštvo BiH vidi kao glave organizacije, vrbovanja i finansiranja bh. državljana za odlazak na strana ratišta". Govorio je Čampara i o Bosnićevoj

ulozi, koji je, kaže, imao veliki autoritet i čija su predavanja imala za cilj regrutaciju mladih ljudi za odlazak na strana ratišta. Naveo je da Tužilaštvo ima dokaze da je Bosnić od jednog Kuvajćanina u samo jednoj transakciji dobio više od stotinu hiljada maraka.

S druge strane, odbrana osumnjčenih smatra da se radi samo o pretpostavkama, procjenama i paušalnim ocjenama koje navode na indicije da su počinjena krivična djela. Također, branioci osumnjčenih su mišljenja da je u pitanju politički proces da bi se aktualizirao ovaj problem.



Nađeno oružje privremeno oduzeto